

卽西隅益建精舍率衆修念佛三昧有白鶴廟居民甚神之師與神授戒改祭爲齋祥符四年講止觀於景德寺道經黃巖有豕奔伏于前推其來乃逸於屠肆者償其直而參之赤山寺瀕海而高先是山顛有異光中現七層浮屠之形周山四十里皆漁人之窟梁或以語師師喜其有先兆遂建塔焉於是居人感化不復爲漁時東山結懺會天大旱師卓錫石縫泉卽激涌七年受杭昭慶請大弘法化從化者衆自是居杭矣八年蘇人以郡符送師于開元建講緇素畢集不葷飲者傾市邑屠酤不售官監有失課之言師辭其徒曰智者遺晉王書有言六恨其一謂以法集動衆妨官爲人所忌余今德薄安可久留遂幡然復杭刺史薛顏始以靈山命師居之卽隋真觀所營天竺寺也天禧三年王欽若撫杭與師道契奏錫天竺舊名復其寺爲教又奏請西湖爲放生池因賜號慈雲乾興元年章懿太后以師重修精進遣使齋白金命于山中爲國行懺天台教文于是入藏矣天聖四年中秋月望之夕桂子降于殿庭師取其實播種林下乃作桂子之詩九年講淨名經忽謂其徒曰昔在東掖講此經夢荆溪授我卷及出室視日已沒今吾

始終此講乎因與衆訣作謝三緣詩謂謝徒屬絕賓友焚筆硯也隨徙東嶺之草堂明道元年十月八日示疾不用醫藥惟說法勉衆而逝壽六十九臘五十三逝之夕山中人見大星殞於靈鷲峯越明年仲春四日奉遐榻葬于寺東月桂峯下師始出家郡按諸生慕師才俊勉回業儒爲詩答盧積中有真空是選場大覺爲官位之句人多誦之常行三昧以九十日爲期於行道四隅置鍤熾炭遇困倦則漬手於鍤十指惟存其三崇寧三年賜號法寶大師紹興中又諡懺主禪慧云

長水法師傳

子璿秀州人自落髮誦楞嚴經不輟從洪敏法師講至動靜二相了然不生有省謂敏曰敲空擊木尚落筌蹄舉目揚眉已成擬議去此二途方契斯旨敏拊而證之然欲探禪源罔知攸往聞瑯琊覺禪師道重當世卽趨其席值上堂遂問曰清淨本然云何忽生山河大地覺憑陵答曰清淨本然云何忽生山河大地師領悟禮謝曰願侍巾瓶覺謂之曰汝宗不振久矣宜厲志扶持報佛恩德勿以殊宗爲介也師如教後住長水衆幾一千弘賢首教疏楞嚴經十卷御史

中丞王隨序而行之紙為之貴賜號楞嚴大師嘗示  
眾曰道非言象得禪非擬議知會意通宗曾無別致  
由是二宗仰之後跏趺示疾以兩甕合之葬於真如  
院兀朮入寇發視指爪繞身復瘞而去

從雅少康傳

從雅錢塘人賜號法寶始從海月學通止觀乃自謂  
曰言清行濁賢聖所訶遂入南山天王院誦法華經  
至五藏金剛般若四藏彌陀經十藏合五千四百十禮  
八數為一藏  
舍利塔十遍合八萬四千  
拜為一遍禮釋迦三十萬拜彌陀百  
萬拜佛號五千萬聲禮法華一字三拜者三過心期

淨土一生坐不肯西憲使無為楊傑為製安樂國讚  
三十章以美之其一云淨土周沙界何勞獨指西但  
能從一入處處是菩提師欲廣化世俗遂於受業淨  
住寺圖九品三輩刻其讚于石觀者皆知感化一日  
無病跌坐而逝有天樂鳴空異香入室之瑞

少康不知何許人姓周賜號廣道禪師行化至江陵  
遇一僧曰汝緣在睦州言訖不見遂至睦州日乞食  
城中得錢誘小兒誦阿彌陀佛一聲與一錢多念多  
與未見乏少後于山顛建道場念響佛聲聞數里每  
念佛一聲眾見佛從口出坐逝之夕有光燭烏龍山

山色爲變白

本如子琳二公傳

本如四明句章人初依學法智於千衆中有少俊聲嘗請益經義法智曰爲我作知事三年却向汝道暨事畢復以爲請法智厲聲一喝復呼云本如師豁然有悟爲頌曰處處逢歸路頭頭復故鄉本來成現事何必待思量法智肯之曰向來若爲汝說豈有今日祥符中慈雲遷靈山向法智求可爲繼法智曰當於衆中自擇之慈雲閱視至師乃云斯人可也師至承天大弘法道歷三十年衆嘗五六百人離言顯法法智用掣電之機繼闡求人慈雲具擇法之眼教未嘗不爲禪也更有禪而爲教如永明長水者後如公百年則有子琳琳陞佛智裕公之堂得言外之旨故于講演惟提大意揭綱宗不沾泥于名相使聞者恍然自得皆知道之在已不關文字而又不外文字也雖老禪宿德無不趨下風聆警欬皆服其辯而厭其心大慧杲公醉心焉嘗謂師曰時人祇知老姪有教徑山却許老姪有禪杲於裕同嗣佛果故稱師爲姪云仍爲師題其真曰悟得旋陀羅尼三昧于一切法得大自在舌端之上海波翻第一義諦無違背孝宗乾

道元年春召師問道上曰朕欲讀經以何爲要師曰金剛圓覺最爲要道曰參禪如何師曰禪須自悟曰以何爲功師曰澄寂身心久當自契上說一日謂門人曰吾爲首座十八年日課蓮經一部夢間嘗見普賢住持以來無復夢見信知領徒損已其言有徵又半載書偈而化

思悟慧舟傳

思悟錢塘人侍慈雲最久深達觀道嘗以咒水愈人疾求者如市當課誦時身及奉像俱出舍利天聖三年慈雲欲以智者教卷求入藏文穆王公將聞之朝

悟曰此非嘗事也小子將助之乃繪千手大悲像課咒以誓曰事果遂當焚軀爲報會公薨悟咒益精明年得旨師喜甚積薪爲樓白慈雲求火種雲于鑪中舉紅炭與之引手以承了無難色卽入薪樓火滅後袈裟覆體儼然如生雲乃加香木行咒願以焚之隨燄而化五色舍利無數慈雲爲讚以刻石曰悟也吾徒荷法捐軀其燄赫赫其樂愉愉逮火將滅儼如加跌逮骨後碎粲如圓珠信古應有今也則無芳年三十真哉丈夫

慧舟丹丘人棄家入道勤行四三昧天聖初結同學

十人行大悲行法者三年結十四人行普賢行法者又三年初入期誓於像前曰倘此三昧有成當焚軀以效供養行法既周回故里求證于神炤炤欲全其重願諭道俗輸香木成大積仲夏晦日炤囑之曰法華尊施爾克修之梵網明晦爾克遵之惟繫心法界身如火如則一聚之燼乃三昧之蘊喜見精進以奉淨明真供唯子行焉舟奉教致謝端坐薪塔火光屬天了無傾側舍利晶耀求者皆如其願火後收餘骨瘞之

仁岳傳

仁岳雪川姜氏子自號潛夫聞法智南湖之化往依爲學至水月橋擲笠水中曰吾所學不成不復過此橋法智器之居以東厦白晝焚膏專事細繹鄉書至悉投帳閣未嘗啟視因出境分衛乘舟水行偃臥舒足豁然自得若拓虛空檣爲之折每請益函丈擷大屨關大鑰衆望風畏之嘗與十同志修請觀音三昧因疾有間宴坐靜室恍如夢覺自謂向之所學皆非乃述三身壽量解以難妙宗道旣不合遂還浙陽靈山慈雲攝以法裔四明乃加十三料簡以斥之師復上十諫雪謗往復不已會昭慶有請慈雲爲詩以送

之學徒從往者半雲弗之止既遷石壁復徙靈芝時法智已歸寂師臨衆自詫曰只因難殺四明師誰向靈芝敢開口有仁行人自永嘉請居淨社一住十年大弘法化以年老還鄉雪守請主祥符觀察使劉崇廣爲奏命服樞密使胡宿爲請淨覺之號晚年專修淨業然三指供佛持律至嚴不以事易節創隱淪堂休室以爲燕居治平元年春謂門人曰我翌日午刻當行至其時說偈安坐而化塔全身於何山之西師著述甚富尤精於楞嚴故注筆甚勤有會解十卷熏聞記五卷文句三卷又爲說題并懺儀等書世師家者可久靈炤別具

惟已傳

惟已字亞休邛州蒲頓人姓仇氏自童時趨尚高遠無所嗜好惟喜佛事不救之而自率父母知其異根也俾隸大邑靜林僧籍事仁普爲師落髮受具入成都講庠習經論通曉奧義七年而還舊居其所止悉荒落不治陳屋數間腐椽破壁欹斜罅漏已恬然處其中無厭色鄉人胡惟岳者高世之士與已遊處甚厚以詩相往來已嘗以詩見邑宰祕書丞勝喬喬來謝見庭廡壞裂殆不可坐起倡邑人爲修之已德業

日遠已事外遇物感興時亦作詩其句度夷澹精粹  
與人語和軟未嘗輒迂人出入縣中六十年亦未嘗  
以愛惡置利害于其間素堅強少疾狀貌修偉慈恕  
溫裕人無少長咸願見之見必拜伏欣喜丁寧留連  
爲誨諭慰滿而後去一日戒弟子惡不宜爲善不宜  
失語已攝足趺坐而逝搖挽莫動疑如塑刻年八十  
六治平元年十月也四衆以真身建蘇塗而扁藏之  
使來者觀相起善焉文與可弔之曰余往年嘗居郡  
幕識師甚熟後復來權州事師則已化矣歸日枉道  
過邑詣師塔下旋繞瞻禮悲悼歎息雖師之面目如  
生而師之語言已不聞矣爲銘其塔

元淨傳

元淨字無象杭州於潛徐氏子生而左肩肉起如袈  
裟縹八十一日乃沒十歲出家十八就學於慈雲不  
數年而齒高第嗣謁明智嘗於講次聞法感悟泣下  
如雨代述十五年杭守呂溱請住大悲閣奏賜紫衣  
辨才之號嘉祐中中翰沈遘撫杭以上竺宜講宣奉  
師居之學徒大集鑿山增室幾至萬礎熙寧三年杭  
守祖無擇坐獄於樵李師以鑄鐘例被追辯旣而得  
釋還山又有利山門施資之厚者倚權以奪之衆亦



隨散逾年其人以敗聞朝廷復畀師衆復集趙清獻公與師爲方外友爲之贊曰師去天竺山空鬼哭天竺師歸道場重輝未幾謝居南山之龍井其後間一出應南屏與靈山祖塲俯就衆誠耳皆坐席未暖而還元祐四年東坡治杭嘗問師曰北山如師道行者幾人師曰沙門多密行非可盡識坡子迨生四歲不能行請師落髮摩頂數日卽善步嘉興令陶彖有子得魅疾師適至秀彖袖香虔請因杖策隨至其家兒病方劇師趺坐引而問曰汝居何地而來至此答曰會稽之東卞山之陽是吾之宅古木蒼蒼曰汝姓誰

氏答曰吳王山上無人處幾度臨風學舞腰曰汝柳姓乎乃蹶然而笑師良久呵曰汝無始以來迷已逐物爲物所轉溺于淫邪流浪千劫不自解脫入魔趣中橫生災害延及無辜汝今當知魔卽非魔魔卽法界我今爲汝宣說首楞嚴祕密神咒汝當諦聽痛自悔恨訟旣往過愆返本來清淨示訖遂號泣不復有云自是兒帖然凡人病患魔祟師咒水灑之無不立愈是皆道德淳厚所致也將示寂乃入方圓庵宴坐謝賓客止言語飲食至七日出偈告衆卽右脇吉祥臥奄然而逝時元祐六年九月晦日也壽八十一適

符條沒之數塔于本山東坡命子由爲之銘師講說不間晝夜嘗曰鬼神威德不具者晝不得至夜中人靜庶幾能聽焚指供佛左三右二有欲效之者師止之曰如我乃可修西方淨業未嘗須臾廢或禱大士求放光光隨現沙門熙仲對食視師眉間有光遽起攬之得舍利數粒後人常於師臥處得之有李生辯而無行欲從師出家東坡爲之請未言其名力拒不許若先知然秀州狂僧號回頭以左道惑衆宣言欲建大塔爲吳人植福施者雲委以師不可欺憚於入杭先遣使願以錢十萬供僧師答曰承以建塔淨財欲飯僧教有明文不許互用狂人大慙而止

繼忠左伸傳

繼忠字法臣永嘉丘氏子父母求嗣佛祠同夢一僧授以好子云螺溪尊者寄汝養之母娠卽厭葷血幼見佛像必致敬八歲得度卽詣南湖依廣智學勞苦得疾乃行請觀音三昧感大士放光以水灌頂其疾卽愈旣而洞悟教觀廣智深契之時令代講雪竇顯禪師見而歎曰四明之道爲有傳矣永嘉士庶請居開元東閣遷妙果慧安退隱江心嗣又出主西湖法明學者驟集有欲革大其居者師曰施者方受其福

吾忍毀之乎每歲正月上八於郡中授菩薩戒行放生事士庶嘗至數萬人每誓於衆曰入吾道場而皈命三寶者縱未得道願生生世世不失人身正見出家求無上道行法華光明彌陀觀音三昧日不虛過誦咒救疾神應莫測每入市坐者避席行者避路舉首加敬稱爲戒師元豐五年十月八日沐浴更衣坐脫人見赤光炤澈空表鳥雀悲鳴三日不下

左伸臨海人從東掖神炤授菩薩戒及大乘法要深有契悟神炤對衆摩頂與記自是嚴奉戒律遇事不易其節刻西方三聖像日夜虔事誦法華三千四百部金剛經二萬過紹聖二年秋臥疾命僧唱法華題增授菩薩戒尋夢三偉人立於江臯召已登舟瞥然西邁師知往生有期乃命僧誦阿彌陀經未徹卽云我已見佛光矣遂沐浴更衣戒左右勿哭勿逼吾前稱佛結印而化

從諫希最二師傳

從諫生處之松陽毛氏幼見佛經輒能自誦父曰再來人也十九試法華得度謁辯才夙夜聽習復依南屏於金山問辯如流南屏歎曰吾道由子而行矣熙寧中講於明慶徒衆日蕃乃遷淨住元豐初處人建

壽聖迎居之越三年辯才主南屏自以年老致師首  
衆遂舉以自代元祐五年上竺虛席囑郡守蒲宗孟  
曰靈感勝跡非從諫不可郡用其說復爲奏賜慈辯  
之號大觀二年辭歸壽聖門學車溪普明等十人詣  
師省候師曰諸子遠至後會無期老僧不如乘興便  
行遂升座說法書偈而逝

希最雲川施氏子四歲出家十五傳教觀於廣慈同  
門良愛號爲義虎治平中始敷講於嘉禾隆平繼徙  
居勝果有空室崇所棲師咒土擲之得片紙書今被  
法遣法力沒當復來數日擊物颶火變怪百出師訶

之曰不聞惱法師者頭破作七分乎乃爲廣說輪轉  
因緣衆僧聲咒爲其破障忽空中轟然擲朱書云漢  
朝烈士沈光今知悔過謝罪且云蒙師法力當往生  
它化天矣自此遂絕師因淨覺背宗上十諫書法智  
作解謗淨覺復作雪謗時法智在疾不復答淨覺在  
靈芝對衆詫曰只因難殺四明師誰向靈芝敢開口  
師不甘乃作評謗以極辯之其略有云近覩雪謗盛  
製所謂救生法二身雪增減二謗者也然此書一往  
可觀再言有失解謗雖已煥然雪謗猶自冰執今據  
吾祖之格以評閤黎之謬解淨覺見之曰四明之說

其遂行乎元祐庚午秋坐化闍維得舍利數百  
系曰慈辯雖教人每與禪衲遊嘗問道於大通通寄  
以書發緘睹黑白二圓相恍然有悟答偈曰黑相白  
相擔枷過狀了不了今無風起浪若問究竟事如何  
洞庭山在太湖上慈辯眼光出涯涘矣由是而知得  
台宗之真者不在言說間也

靈炤傳

靈炤生蘭溪盧氏幼失恃怙向兄求出家兄難之曰  
使藤繫汝俱碎可從汝意師忻然入林取藤成束置  
兄前曰果容入道用此繫我俱碎無恨兄不能奪遂

入寶慧寺誓去枕席香燈禮誦未期月誦通法華光  
明具戒後往依淨覺於吳興一家戶牖無不通達初  
主吳山解空繼遷景德熙寧中徙雲間超果自元豐  
以來於每歲春首結淨業社七日期預者二萬人念  
佛獲驗不可紀錄嘗夢三聖儀相前跪作禮曰靈炤  
一生誦大乘經期生安養爲果願否觀音指曰淨土  
不遠有願卽生又誦經深夜忽夢普賢示身遂造其  
像誦經萬部以嚴淨報元豐五年冬臥疾謂侍者曰  
吾安養之期已至遂面西累足而化闍維異香襲人  
舍利流迸結塔院東南隅

介然能師二公傳

介然四明鄞人也受業於福泉山之延壽明智居南湖從其學悟教觀之旨元豐初專志淨業謂同行曰念佛三昧往生要法也乃然三指建十六觀堂中設西方三聖環以池蓮功成復然三指於是修觀之士有所依賴焉建炎四年金虜犯明州寺衆奔散師獨不去虜奄至訶之曰不畏死邪師曰貧道一生願力建此觀堂今老矣不忍捨去以求生也虜酋義之謂曰爲我歸北地作觀堂似此規制遂逼師以行後人悲思乃以去日爲之忌遙尊之曰定慧尊者未詳所

終

能師嘉禾人少學能仁入懺室四十載六時行道雖病不廢唯不食數日其病自愈行人之名遂聞江浙年旣老讀文如初學草庵戲之曰未忘筌耶師曰筌何所忘庵大慚嘗暑曬衣歎曰慷慨丈夫反同臧獲於是散去餘長惟留一弊絮袍夏則束梁椳間袒膊入林施蚊一日逢二虎以身就之虎俛首而去山神興供一方嘗與交接適香積有乏知事來告師力拒之明日施自至皆曰昨夜行人巡門相報始知山神荷師以往圓覺慈公有能仁之命師與文首座然指

以請及其至晝夜請益大有開發未詳所終

處咸處謙二師傳

處咸生天台王氏七歲入國清十四受具戒力學無對入天封三年畢閱藏典謁神炤深契教旨爲人恭默自遜神炤託疾命代宣衆一聆而心服初住赤城崇善李庭芝守台夢神人曰公典天台五祖臺下有龍頭九九和上宜就見之諮詢莫喻有識者謂李曰天台五祖昔居赤城今咸師住此生于丙辰九月九日其龍頭九九之謂乎李大愕卽命駕造訪師爲談出世道深有契會以寺宇隘陋謀遷之李捐金卜就

東南地開址獲銅磬於土中繼主白蓮師居山五十年登門受道者以萬計元祐元年正月法鼓擊之不鳴師曰吾將行矣期以晨鐘時寂然而化

處謙生永嘉潘氏處胞三年九歲出家謁神炤大明圓頓之旨然三指供佛祈妙悟未幾擢居第一座炤以止觀一帙授之曰汝當建大法幢恨吾不之見耳後屢主大刹道化隆振旨署神悟之號丞相王安石與一時朝賢競爲歌詩以贊其德郡大旱師至龍湫爲龍語忽大風黑雲從湫起驟雨如注師四十年中十坐道場講唱無倦登門受法者三千人熙寧乙卯

撰述  
四月集衆諷普賢行法阿彌陀經乃曰吾得無生日  
用久矣今以無生而生淨土遂寂弟子塔其全身楊  
無爲爲之銘師與咸同出神炤人稱神炤之門二處  
一身云

慧辯思義傳

慧辯字訥翁號海月華亭傅氏子生而穎異父母令  
入普炤出家初遊學天竺扣明智之室盡心於教觀  
智將老命代述八年遂繼其席適翰林沈時卿以威  
猛治杭見者無不惶慄失據師與相對從容如平生  
沈異之任以都僧正時東坡倅杭爲序以送之師容

止端靖不蓄長物盜夜入其棲脫衣與之使從支徑  
去講授二十五年學者嘗及千人晚年倦煩以六事  
隨身歸隱草堂將順寂遺言須東坡至方闔龕四日  
東坡至見其端坐如生頂尚溫乃作三偈以哭之曰  
欲尋遺蹟強沾裳本自無生可得忘今夜生公講堂  
月滿庭依舊冷如霜生死猶如臂屈伸情鍾我輩一  
酸辛樂天不是蓬萊客憑仗西方作主人欲訪浮雲  
起滅因無緣却見夢中身安心好住王文度此理何  
須更問人

思義字和甫與海月同出明智之門難兄弟也智嘗



開幃出十問師答之皆契旨及智退居草堂衆送入室既散師猶侍立智曰爾適何見答曰見大衆拜而退智曰來吾語汝汝行當住此山紹隆大教後亦來居此室也未幾丞相蘇頌帥杭請居天竺弘道二十三年退閑草堂皆如智記熙寧四年賜紫服號淨慧元祐三年二月十八日別衆安坐而逝大衆誦念久之忽復語云侍觀音大士行見一沙門金色長身垂臂謂我曰報緣未盡過七日當遣迎至二十五日復跏趺而化

淨梵齊玉二師傳

淨梵嘉禾人姓管母龔氏夢佛光滿室遂有娠及生因名佛護十歲出家嘗念阿彌陀佛或問年少何遽爾師曰我欲往他方丈求掛搭去十八受具戒卽依超果湛公復謁神悟屢親講說大契宿心元祐初主姑蘇大慈講三大部十餘過餘文稱是稟師戒法者幾滿城邑嘗率二十七人修法華三昧以二十八日爲期如此三會感普賢大士授戒羯磨至稱淨梵比丘則洪聲震響如撞巨鐘師禪觀之處衆嘗見金甲神跪於座前有時一處行懺見韋天按視懺堂行人有遭其點察者輒障起而退政和中太守應公婢爲

與所媿歌笑不休請師施戒卽刻神定信女葛氏請  
爲亡夫施戒卽見夫旋繞師座稱得解脫嘗夜居西  
院時酷暑衆不安臥師方披三衣坐水閣上忽風雪  
飛集涼氣逼人旦謂衆曰夏行冬令衆皆嘆仰知爲  
神龍翊衛變熱爲涼也宣和初郡守賈公敬師高行  
補爲管内法主

齊玉者雪川人尚書莫公支子也早親釋學日記數  
千言屢參明師一日赴僧次遜辭之或問其故答曰  
誠不欲五千之利而喪一日之功居茗溪寶藏每于  
歲終大興淨業之社遷橫山立丈六像率道俗修行  
中夜告衆曰我輩未念佛時心隨塵境作諸不善犯  
一吉羅尚受九百千歲地獄之苦況犯篇聚重罪乎  
今若念佛則可一念能滅八十一劫生死之罪況又  
父母生我令我出家理當度脫以報重恩今若破戒  
墜陷則父母豈不失望大衆聞之無不傾誠懺悔舉  
身自撲至損額失聲者嘗中夜頂像行道偶一僧失  
規責之曰汝無知乃畜生耳已而悔曰彼雖不肖罵  
爲畜生有玷三寶自是三年對佛悔過歲大旱井竭  
師運密禱夢水出西坡旦掘之清流涌出因名夢泉  
二師同建炎元年遷化

從義傳 了睿附

從義溫之平陽人姓葉氏十七通經得度學扶宗深得教旨出世屢遷鉅刹晚主秀之壽聖大闡宗風師雖以圓頓爲門而于戒科猶事謹篤六時三業之間必使纖悉如法憲使劉燾記師行業云端戒清白不妄遊從寤寐三觀耽味著述過午不食非法不言非右脇不臥非瀘水不飲行步有嘗坐立如植未嘗求公卿之知可謂賢也已矣秀有士族請師禱疾師命其徒了睿侍往及歸師正色責之曰汝爲純厚吾故攜汝往何爲俗舍左顧右盼睿謝過而已其處身律物嚴慎如此元祐六年春示寂瘞舍利于錢唐寶藏謚曰神智師著作十餘種數萬言皆詮釋教義耳了睿秀人亦有道士思溪王氏屈睿爲亡女咒食適河冰船不可渡乃遣人報令設座於斛前卽船上遙爲咒願事已忽一女至船禮足爲謝云已得超往因留物爲記忽不見次日王君至船見物驚曰此亡女入斂時所御也

圓明大師演公傳

無演天彭張氏子幼英烈不甘處俗十五棄家事承天院寶梵大師昭符符記之曰此子他日法中龍象

也二十以誦經落髮受首楞嚴於繼靜靜歿卒業于  
惟鳳文昭受圓覺肇論于省身受華嚴法界觀起信  
論于曉顏受唯識百法論于延慶凡此諸師皆聲名  
藉藉師必妙得其家風然後已又從諸儒講學於書  
無所不觀於文無所不能趙清獻公挽師登法席於  
楞嚴了義指掌極談聞者如飲醇酒無不心醉旣於  
此經心融形釋復出入內外篇籍如風行電激所向  
如志又嘗問道於禪師惟迪惟勝師嘿然心許曰此  
自在吾術內矣又作大悲觀音化相宇以崇閣極天  
下之均工珍材二十餘年乃成人以爲莊嚴之冠不  
知師之遊戲也中年喜葛洪內篇延異譎士將以丹  
石伏物皆爲黃金或取其金而畔去師不悔不怒他  
日遇之視之如初此可以觀其德性也寶梵旣歿二  
親又耄期去世乃南遊曰吾聞南方大士有若祖心  
有若克文有若善本皆命世亞聖大人也不可不行  
觀道焉元符三年三月道出戎州憩渝州覺林禪院  
不疾而化僧臘三十有七其法子奉師遺骨藏於寶  
梵塔之西有志不果遽厄於數惜哉

令觀

令觀莆田黃氏子十三出家廣化寺十八受具通易

孟子莊老諸書已而撥去聽講大乘經論他日讀楞嚴經駭然大悟曰世徒傳當年圓覺之圭峰何知不有今日楞嚴之我耶未幾得寺之安養院折筇坏戶而居之標尚質素語終日不妄出身非有迫致或竟歲未嘗倚閭閱大藏經更數返雖老益力又天性慈甚哀病者而急阨窮咒食放生無不爲者貲不逮必解衣就質無難色事佛朝香夕燈者五十年不驅蚊不搔餒蝨不以匡衆爲已任人或戲之曰憊乎觀公奚事爾爲師曰吾非憊者正恐坐此得憊耳其密意警人類如此忽一日示疾語其徒曰有六上人當過

我亟具茗果衆疑師屬疾語迷謬旣而人有賫像自遠至者物色之正六則傳金羅漢也是夜沐浴黎明更衣敷座與衆別勉以無負佛祖語已抵掌就寂實元祐三年八月也住壽九十一僧臘七十三居三日頂猶溫茶毗于寺之北岡火行異香收燼得舌根不壞其徒塔之夜有光炯然自茶毗所屬塔中如往還狀又三日現金銀色舍利環五里餘尺草寸木悉發光曜磨石相土無不得者而不窮也旁近居民至取以售用奇矣盛哉則師生平功行存養之實可知矣

成覺慧悟傳

成覺代州張氏子方學語能誦金剛般若父母異之攜送善住院希公爲童子希公道望赫然賜號慈懿大師移住清涼寺慈懿以師親侍日久心知爲法器一日謂之曰古人謂出家爲大丈夫所以爲大丈夫有四事近知識問正法思義理如說修行是也後生可畏無以吾老滯守一隅爾其行乎由是徧訪師匠依明教大師最久故於惟識一宗洞明底蘊後大弘其道時人謂慈懿以知人有子明教以傳法得人師嘗示學者曰學道人持心有三要曰大曰專曰遠大則佛祖得處我必得之不爲人天小利所牽專則惟究一事不爲名相所引遠則以證爲期死而後已具此之心必能至道務實去華其言大率如此年八十而終

慧悟者生行唐李氏其伯母日誦妙蓮華偈洎終火化舌根不壞悟母嘗夢其伯母執蓮華一莖授之遂有娠師生容面端整舌長覆鼻音聲宏朗爲五臺真容院僧戒慧精明時無有兩元祐初詔入內庭宣闡稱旨賜紫衣僧正之職師力辭獲免崇寧改元復被詔赴京固以老病辭至使者往返乃行次佛道店謂使者曰旣逢佛道吾將歸矣爲吾謝天子言訖屹然

而化

晉水法師傳

附誠法師義天僧統

淨源字伯長楊氏子生而敏慧依東京報慈寺海達  
大師得度奮志參尋初受華嚴于五臺承遷次見橫  
海明覃後謁長水璿法師盡得華嚴奧旨四方宿學  
推爲義龍聲譽籍甚開法泉之清涼蘇之觀音杭之  
祥符湖之寶閣秀之善住屢坐大道場闡揚圓頓極  
旨左丞蒲公守杭尊其道以慧因院易禪爲教請師  
居之道風大振師筆力遒勁合華嚴證聖正元二疏  
爲一以便觀覽製華嚴楞嚴圓覺三懺法及作法華

集義通要十四卷又疏解仁王般若等經

義天者高麗國王第四子辭榮出家封祐世僧統元  
祐初入中國上表乞傳賢首教歸朝弘揚敕有司舉  
可授法者以誠法師對

誠法師者住東京覺嚴寺講華嚴經歷席旣久學者  
依以揚聲其爲人純至少緣飾高行遠識近世講人  
莫有居其右者上表舉師自代曰臣雖刻意講學識  
趣淺漏特以年運已往妄爲學者所推今異國名僧  
航海問道宜得高識博聞者爲之師竊見杭州慧因  
院僧淨源精練教乘旁通外學舉以自代實允公議

上可其奏遣朝奉郎楊億館伴至慧因受法諸刹迎  
餞如行人禮初華嚴疏鈔久已散墜義天持至咨決  
遂得復全義天業就還國留金書華嚴三譯本一百  
八十卷于慧因師乃建閣奉安之時稱師爲華嚴中  
興之祖師之道遂大行海外矣元祐三年冬示寂茶  
毗獲舍利無數塔於院西北壽七十有八義天念法  
乳遣侍僧壽介等過海致祭焉師先世泉之晉水人  
故學者稱晉水法師

有嚴傳

有嚴台之臨海胡氏子母將孕號痛頓仆其兄沙門

宗本曰是必有異若生男當出家母聞合掌以許旣  
而痛止果生男六歲從師十四受具戒閱壽禪師心  
賦若有所悟卽往東山謁神炤於一心三觀之道法  
華三昧之行莫不神解而躬行之嘗讀止觀至不思  
議境曰萬法惟一心心外無一法心法不可得是名  
妙三千初主無相慧因法真自赤城遷東掖舉師以  
代嘗謂去佛久遠人迷自性凡宣演之際必近指一  
心使之易領聞者皆能有入紹聖中郡請主東掖師  
曰智者年未五十已散徒衆吾老矣可堪此耶卒不  
赴隱居故山東峰廬于檀木之傍因自號檀菴一鉢



無長物躬拾薪汲水食唯三白二十年中專事淨業以安養爲故鄉作懷淨土詩八章辭情淒切人多樂誦母病目師對觀音想日精摩尼手母卽夢師擎日當前覺而目明師於三昧中多獲瑞應不可枚舉建中淨國元年定中見天神告曰師淨業成矣又夢池中生大蓮華天樂四列乃作餞歸淨土之詩越七日跌坐而化以陶器塔於菴北有光在塔如月形三夕乃沒

智圓

智圓字無外錢塘徐氏子學語卽知孝悌稍長嘗析

木濡水就石書字列花卉若綿蕪戲爲講訓之狀父母異之令入空門受具戒二十一聞奉先清公傳天台三觀之道負笈造焉二年而清亡遂往居西湖之孤山杜門樂道自號潛夫與林處士逋爲鄰友雅善病又號病夫師嘗嘆荆溪歿後微言墜地曰吾何人也于是著十疏以通經述諸鈔以釋疏翼贊弘宣其功偉矣師雪骨冰心傲然物外視人間之世如織塵過目了不關懷時王欽若撫錢唐慈雲遣使邀師同往迓之師笑語使人曰爲我致意慈雲錢唐且駐却一僧聞者嘆服於講道之外以詩文自娛有禱述五

十卷題曰閒居編以乾興元年二月十七日自作祭  
文挽詞越二日示寂年僅四十有七也預戒門人曰  
吾歿後無厚葬以罪我無建塔以誣我無謁有位求  
銘以虛美我但用陶器二合而瘞立石志名字年月  
而已及亡門人如所戒斂以陶器斲所居巖以藏之  
不屋而壇後十五年積雨山頽門人開視陶器肉身  
不壞爪髮俱長脣微開露齒若珂玉乃更襲新衣屑  
衆香散其上而重瘞之崇寧二年賜諡法慧大師  
補續高僧傳卷第二

補續高僧傳卷第三

明吳郡華山寺沙門明河撰

義解篇

宋中立傳

中立鄞之陳氏子母夢日輪入懷遂有娠夜不三浴則啼號不止九歲出家受經一誦永憶不忘治平中試經開封得度依神智於南湖渡神智開幃設問荅者二百人無出師右及神智謝事乃俾師為繼元祐初高麗僧統問道中國甫濟岸遇師升堂歎曰果有人焉遂以師禮見師令門徒介狀始作十六觀室以

補續高僧傳卷第三

明河撰

國家圖書館 NATIONAL CENTRAL LIBRARY, TAIWAN, R.O.C.

